

10 JUN 2003

MAHATHIR-EKONOMI

PAKEJ RANGSANGAN ELAK KESAN NEGATIF EKONOMI SUKU KEDUA 2003

PUTRAJAYA, 10 Jun (Bernama) -- Datuk Seri Dr Mahathir Mohamad berkata pertumbuhan ekonomi mungkin menunjukkan kesan negatif pada suku kedua 2003 sekiranya kerajaan tidak mengambil sebarang langkah untuk mengatasinya.

Menyedari hakikat itu, Perdana Menteri berkata kerajaan telah mengumumkan Pakej Strategi Baru pada 21 Mei lepas yang bertujuan untuk merangsang kegiatan ekonomi di samping menangani kesan negatif perkembangan luar negara.

Menurutnya lagi, angka-angka sehingga Mac 2003 belum lagi memperlihatkan kesan perang Iraq serta wabak Sindrom Pernafasan Akut Yang Teruk (SARS) terhadap ekonomi negara dan kesan negatif dijangka berlaku pada suku kedua dan seterusnya jika tiada sebarang langkah diambil.

"Sekiranya terlaksana 90 langkah-langkah yang diperkenalkan, saya yakin ekonomi negara mampu mencapai paras pertumbuhan melebihi 4.5 peratus yang diunjurkan sebelum ini," katanya ketika mempengerusikan Sesi Keempat dan terakhir Dialog Bajet 2004 di sini.

Dr Mahathir berkata negara kini berhadapan dengan persekitaran ekonomi dunia dan perdagangan antarabangsa yang tidak menentu berikutan perkembangan geopolitik dunia dan ancaman SARS.

Beliau berkata isu keganasan kembali semula dengan peristiwa pengeboman di Riyadh, Maghribi, Afghanistan dan Israel. Pergolakan juga berlaku di Aceh yang berjiran dengan Malaysia.

-- BERNAMA

MAM NHD